

# Nov sistem da premias pli favuraivel e pli simpel

Novas tariffas tar l'Assicuranza d'edifizis dal Grischun

■ **(cp) Il sistem tariffar da l'assicuranza d'edifizis dal Grischun AEG vegn simplifitgà fermamain: Empè da passa 100 variantas da tariffas datti da nov mo pli trais. Tuttas èn vegnidadas reducidas. Ils supplements per ristga da fieu da las interpresas crodan davent. Perquai che la AEG ha pudì furmar avunda reservas per ristgas grondas durant ils decennis passads, po ella conceder al pievel grischun ed a l'economia dal Grischun cun il nov sistem reduziuns da premias annualas dad 8 milliuns. Il sistem tariffar vertent n'è betg pli confirm a las ristgas ed è cumplitgà. Il sistem tariffar da fin ussa è creschì historicamain e na correspunda betg pli a las pretensiuns dad oz per in sistem d'assicuranza effizient ed effectiv. Cun sias passa 100 variantas da tariffas è il sistem memia differenzià e pia intransparent. Ultra da quai na reflectescha el betg pli la situaziun da ristga actuala. Las prescripziuns per la protecziun cunter incendis ch'èn fitg effectivas laschan d'adventar obsolets ils supplements per ristga da fieu ed ils motivs per conceder rabats sin ils supplements èn per il pli antiquads e na promovon strusch la prevenziun. Il giudicament da las ristgas da tut ils edifizis che na servan betg ad intents d'abitare (economia ed administraziun) custabla. Pli grondas donns da fieu na sub-**

eschian dentant ils edifizis da las classas d'edifizis da fin ussa er betg. Cuntrari a las ristgas da fieu, avain nus paucas pussaivladads giuridicas da prevegnir cunter donns elementars tar ina part dals edifizis en las zonas da privel melnas e tar ils edifizis existents en tut las zonas da privel, uschia ch'i s'impona da mantegnair in simpel supplement per ristgas da donns elementars.

Enfin ussa stueva l'assicuranza d'edifizis far gudogns per furmar ulteriuras reservas ch'èn necessarias – sco chapital da ristga – per donns senza reassicuranza. Cun reservas da circa quatter promils dal chapital d'assicuranza vegn cuntanschida la finamira strategica per la fin da l'onn 2014.

## Parameters dal nov sistem tariffar

L'assicuranza d'edifizis dal Grischun duai sco fin ussa garantir a la clientella ina protecziun d'assicuranza cumplissiva da ses edifizis cunter donns da fieu e cunter donns elementars, e quai en furma d'ina assicuranza da la valur da nov. Las proprietarias ed ils proprietaris d'edifizis furman ina cuminanza solidarica perquai che la AEG sto assicurar tut ils edifizis, er quels che han ristgas in pau pli grondas pervia da lur situaziun sco er pervia da las pitschnas differenzas da las premias. I duai vegnir tegnì quint da las

differentas ristgas d'in edifizis en emprima lingia tras la prevenziun (protecziun cunter incendis e prevenziun cunter donns elementars) e betg tras differenzas da tariffas antiquadas. L'eliminaziun dals supplements per ristgas da fieu da las interpresas e da las administraziuns publicas correspunda al standard da construcziun dapi quasi 30 onns. I dat segiramain anc edifizis economics pli vegls che han ristgas pli grondas. Lur part è dentant pitschna e daventa pli e pli pitschna tras la construcziun da novs edifizis. Ina giada èsi da far la correctura da questas ristgas. Uschia èn er pliras autras assicuranzas chantunalas d'edifizis actualmain vidlonder d'eliminar ils supplements per ristgas da fieu (p.ex. Son Gagl) e l'assicuranza d'edifizis la pli gronda, quella da Turitg ha gia dapi decennis ina premia unitara.

Cun ina tariffa da basa per edifizis en construcziun massiva che vegn reducida per 3% e cun ina tariffa da basa per edifizis senza construcziun massiva che vegn reducida per 2% sco er cun in sulet supplement per ristgas elementaras spezialas vegn il sistem tariffar simplifitgà fermamain. Il nov sistem tariffar è transparent e lev da declarar a la clientella.

Ils trais supplements per ristga da fieu actuals cun lur differents rabats da prevenziun vegnan abolids. Da quai profita

massivamain l'economia dal Grischun, perquai che quests supplements per ristgas spezialas d'incendi vegnivan incassads d'interpresas da producziun, da mastern u da servetsch. Retschertgas scientificas e la statistica da donns da plirs onns mussan che spezialmain ils edifizis pli novs da quasi tut las branschas economicas n'han betg dapli ristgas ch'ils edifizis d'abitare.

Da nov datti anc duas classas d'edifizis che vegnan furmadas sin fundament da la moda da construcziun da l'edifizis (enfin ussa trais classas) sco er in'eventuala premia per ristgas elementaras (enfin ussa trais differents premias supplementaras). La differenziaziun da las tariffas per la nova classa d'edifizis A (29 raps/1000 francs summa d'assicuranza) e la nova classa d'edifizis B (49 raps/1000 francs) dependan dal fitg different andament dals donns en cas d'in incendi. Ils edifizis da la classa B – enfin ussa edifizis senza construcziun massiva – subeschian en cas d'in incendi pli savens in donn total ed ils donns d'aua tras ils pompiers èn bler pli auts.

In supplement da 30 raps/1000 francs duai exister vinavant per ristgas spezialas da donns elementars. Perquai ch'i na dat naginas prescripziuns da prevenziun concretas – cuntrari a la protecziun cunter incendis – tar projects da

construcziun en territoris da privel melens, duain las proprietarias ed ils proprietaris d'edifizis ch'èn prontos da prender mesiras per proteger lur objects vegnir cumplissads cun la renunzia d'incassar in supplement per donns elementars.

## Consequenzas

La renunzia d'incassar supplements da fieu e la leva reduziun da las tariffas da basa chaschunan per la AEG entradas pli pitschnas da circa otg milliuns francs per onn, quai correspunda ad ina diminuziun da las entradas da premias da circa 25%. La distgargia da las proprietarias e dals proprietaris d'edifizis en general e da l'economia dal Grischun en spezial e pussaivla per la AEG senza ch'ella stoppia reducir ses standard da ristga, perquai che las reservas ch'èn vegnidadas augmentadas fin ussa han cuntanschì in stan, cun il qual la AEG po covrir er en l'avegnir ristgas d'assicuranza che han ina probabilitad da capitar da passa 1000 onns. La AEG sto empruvar da cuntanscher quintes equilibrads e furmar reservas da gudogn mo pli en la dimensiun da l'augment da la summa d'assicuranza. Suentar che la regenza ha adattà las tariffas per il 1. da schaner 2015, vegn la clientella a survegnir il favrer in quint che vegn gia fatg sin basa da las tariffas reducidas.